

dauänd di loid um an rum - des mechdi fai auf di dauä figgsä-fäddich. deä masdä, des hobbi na ogsäng, wollt amoll füä boä minuddn sai ru hom un drum sämmä noch beddschdodd (däs hasd bai di annän fiä schlaggn Bethsaida) mundä - do is di kaddes gfreggd. obbä do mus widdä aanä sai m:ul ned kaldn hom - beschdimmd deä maddl di old braigoschn - auf amoll, miä hom grod a boä gämüdlicha saidla naigschdöäddsd kobd, woä scho widdä a bloosn um uns rum.

Äs woä scho dsimlich schbed om noehmiddoch - grod hodds dsän engl des heän gäloid - do binni no dsän masdä un hob gsochd: "Äs gschaidsta du schiggsd si ham, di solln schaua dassi wos dsän baisn finna un ob. wädd goä ned so ainfoch sai, di wäddschaftn do häraun sänn nedd di weld un a gschaida broddsaid gibbds aa ned." deä masdä hodd, däs hobbi na glai ogsäng, ned rähd gädsong un brombd sähdä - ich glaab ich höä ned rähd: "schaud dassdä denna loid wos dsä ässn gäbbd." "woss dsän ässn" hobbi gsochd, walli hald mai goschn ums freggn ned haldn ko, "wasd wosmä nuch hom: drai laabla un dswaa döra maafischla - di sänn a scho fasd nübä." deä andres, deä frissd jo niggs, deä döä freggä, hod aus sain ruggsogg nuch dswaa fägrübblda laabla gädsong. "fümbf brödla un dswaa fischla - des is alläs" hobbi gsochd, "des langd ned amoll füä uns boä mennla, scho goä ned füä di rass" edwäd woäns, ich hau ned aufn budds, fällaichd fiädausnd - waibä un bangädn ned midgädseld. "höggdn du lesd an schbringa, abbä du wasd ja, an naggädn mo kommä ned nai sai daschn langa." "dus amoll heä" sehdä dsä miä; do hobbi scho gäwissd, edsd mehdä widdä sain hidd: nimmdi fümbf laabla un die dswaa döän fischla, schaud nauf dsän himml - ka aandsiggs wölgla woä dsä seng - dsäbröslä alläs a weng dswischä di fingä, mehd sain seng, gibbdmä si widdä reduä un sehd brüworm "fädaaln!" woss wisd machn, hobbi mä gädochd, deä wäd scho seng, wi waid dassä kumd mid saäna boä laabla un di dswaa fischla. obbä iä wädds ned glaam; mid dena boä fischbrödla hom miä di gands багаасch obgfüddäd un dsän schlus sin nuch dswölf körb übrichgäbliim - des woä kloö: fischbrödla bai dera hidds, do weä a dswädschgäbaamäs oddä a dsiwäläskees gschaidä gwesn - obbä ich hob desmoll gädochd, mischdi ned nai, fäbrennsdä bloos widdä dai goschn.

obbä des aana mussi oich doch nuch dädseln; di annän hom dswoä
gsochd, des däff kaans däfoän - obbä schais drauf. om neggsdn
dooch sänn a höffn loid kunna un homm dribbäliäd, dä masdä soll
iina helfn, iina weäs schbaiübl - ich hobbs jo gleich gsochd,
fischbrödlä bai dera hidds, wu eä sunsd so gschaid sai will.
noija, eä hodds widdä nogäbrochd - obbä wissn hädds hald doch
kaans gsollä, di schand.

oddä hobbd iä scho moll wos köäd fo aana hailung deä fischfä-
giffdedn? beschdimmd ned.

gerhard c. krischker